


www.BibleForChildren.org

Mataayo 26




Hano
syaatighaayë
sinsikö isansabha
igho inyangi iya
Epasaka etaraahika,
Yëësu akahika Bhetania,
mu-kishishi keno
yaaryökëëyi-mo Raazaaro
ukurwa mo-bhaku. Mbe,
Maryamu akaghegha
inshubha iya amaghuta
agha öbhöghöri obhonene agha
ikirumba ikiiya, akahaka Yëësu
ko-maghörö, akamweya ko-maghörö na situukya
isyaye. Inyumba yonswe igho, ekeeshora ikirumba
ikiiya ikya amaghuta ghayö.




Mbe, Yuuda Isikariyote, ömwë mo-bheegha ikömi na
bhabhërë abha Yëësu, akaghya ko-bhanene abha
abhasëngëri, ukunyeera Yëësu
inikö, okore abhööröki enshera
iya okomoghoota.




Hano abhanene abha abhasengëri bhaaighuurë
amang'ana ghayö, bhakashomerwa bhököng'u.
Bhakaikererrania na Yuuda igha
bhamohaane seehera. Mbe,
Yuuda akasimya ukutuna
umweya umuuya ughwa
okobhaghöötya Yëesu.



Abheegha bhayö bhakaghya,
bhakakora kya bhoora Yëesu
yaabharaghërrëyi, bhakasëemya
ibhyakorya ibhya Epasaka.
Yëesu akaghegha omokaate,
akakumya Waryobha,
akaghobhotorä, akahaana abheegha
abhaaye. Akabhatëëbhya igha,
"Mogheghe moraaghere,
ghono ngo
ömöbhërë
ughwane."



Akaghegha ghwiki ekekombe keno
kyaarë na idivai. Akakumya
Waryobha, akahaana abheegha
abhaaye. Akabhatëëbhya igha,
"Mogheghe idivai eno, munywe
bhonswe igho. Ko bhoora ghano ngo
amaanyinga aghaane agha Imuuma,
ghano ghareeteke ko okoghera iya
ukwabhera abhantö
ëbhëbhë
ibhyabho."



Yëësu akaghamba igha, "Uwe Simööni, uwe Simööni
uwe! Omanyë igha, Oghosambwa ghosabhirë orohosa
ku-Waryobha, ghobhashaashi bhëënyu bhonswe igho.
Nerebha n-kya ukwirura öbhörwë. Kasi nkosabhëëyë
ku-Waryobha, okore umukumo ughwaho
ghotakasuuha. Na hano urinkyorra, oseghe
bharikyaho."



Simööni akamohonshora igha, "Ë ore Omonene
uwëëtö! Öni ndatora ukughya okobhohwa hamwë
na uwe. Kora nenkaakwa te-ng'ana hë!"
Yëësu akamohonshora igha, "Uwe Peetero
ndakötëëbhya igha, noraashe onkaane katatö
reero, setaraaraghora."



Ho Yëësu yaamarrë,
akaghya ahasë hano
haabherekerwanga igha,
Ghetisemane.

Akatëëbhya abheegha
abhaaye igha, "Mwikare
hano, öni nsuntare haara
nsaasaame Waryobha."

"Taata, ku-uwe ghonswe
igho nkobha gharë. Ku
bhuyö ndakosabha unduusiri-ho
ekekombë ikya inyaanyi eno.
Kasi, otakaakora bhono öni
nkutuna, kora bhono uwe
ukutuna."




Mbe, Yuuda akatangata rikomo irya abhasirikare
abha Ikiruumi, hamwë na abhasirikare abha
risengerro bhano bhaatömirwë na bhanene abha
abhasëngëri hamwë na Abhafarisaayo.

Bhakaghya mu-bhusitaani muyö,
bhaghötërrëëyë setara bheena
imyenge na ibhyöghë. Kamwë
igho, uwöndë akagheesha
omoghorwa uwa omonene
uwa abhasëngëri,
akamobhotora ökötwë ukwa
bhoryo. Yëësu akaghamba
igha, "Morenge hayö!"
Akakunia ökötwë ukwa
omoghorwa, akamuhwënia.




Hake igho, abhantö bhayö bhakamoghoota,
bhakamuhira mu-nyumba iya omonene uwa
abhasëngëri. Peetero akabharwa nyuma,
arëngë ahare. Hano
abhantö bhayö
bhaahikirë, bhakakora
ikyoto kö-bhööri,
bhakaikara-ho.
Peetero wonswe
akaasha, akaikara
nabho hamwë.



Ömwë uwa abhaghorwa
abha omonene uwa
abhasëngëri ono yaarë
umuhiiri uwa ömöntö
oora Peetero
yaabhötöoyë ökötwë,
akamöbhöörya igha,
"Tenaarënkörööshë
mu-bhusitaani haara hamwë
na Yëësu?" Peetero akaikaana
ghwiki igha, "Tö-öni hë." Këmwë
igho, sekaraghora. Ho Peetero
yaang'ösirë kughya kebhara,
akasimya ukukuura bhököng'u.




Mbe, bhayö bhonswe igho
bhakeemoka, bhakahira Yëësu
ku-Piraato ömötöngi uwa Yudea.
Hayö ho Piraato yaamöbhöörri igha,
"Uwe no-mokama uwa
Abhayahudi örë?"
Yëësu akamohonshora
igha, "Uwe, oghamarre."




Piraato ghwiki yaatunanga ahaatere
Yëësu, ku bhuyö ekaghera akore
ikiina na abhantö bhayö. Kasi
bhakaghëndërrya okokora ikituri
igha, "Uwe otamohaneka
ko-mosarabha,
mohaneke
ko-mosarabha."




Mbe, Piraato akabhahaana Yëësu
okore ahanekwe ko-mosarabha. Mbe,
abhasirikare bhakaghegha Yëësu,
bhakaghya nawe. Yëësu yaarenga
aghëghirë omosarabha ughwaye hano
bhaaghendanga, akaghya ahasë hano
bhakobherekera ku-Kiëbhuraania
igha, Ghorighoota, ensonga yaamo
ni-igha, ëkëhöörë ikya ömöntö.



Abhantö abhandë bhabhërë, bhonswe
bhaahanëkirwë ko-mesarabha, ömwë
orobhareka urwa bhoryo urwa Yëësu,
na uwöndë orobhareka
urwa bhömösi,
Yëësu akabha
ghatë yaabho.



Enkaagha eno iryobha ryaahikirë ko-motwe bhöröngë,
bhokabha ubhwira kabhërë kora kekabha ikisuntë
ku-kyaro kyonswe igbo kohekera saa kenda. Ripazia
irya ukusiikirrya inyumba iya
Waryobha, rekatandoka
mabhaara abhërë kamwë
igbo. Yëësu akakuura
bhököng'u igba, "Ë Taata
uwëëtö, ndatoora öbhöhöru
ubhwane ku-uwe." Na hano
yaamarrë okoghamba
ghayö, ghokahwa-mo.



Hano omoghorobha ughwa urusikö
urwa ësëemyö iya urusikö urwa
Obhotooro ghwaahikirë,
akaasha ömöntö ono
yaabherekerwanga igha
Yusufu, Omoarimatea.
Yaasookwanga
bhököng'u
mo-bharasa iya
Abhayahudi,
ghwiki

yaaitem' eranga
ukuusha ukwa
Obhokama
ubhwa Waryobha.
Akakareha ukughya
ku-Piraato okomosabha
igha, amwikërerri
agheghe ikihundughu
ikya Yëësu,
akebheeke.



Mbe, Yusufu akaghora ishuuka iya
eketani iya öbhöghöri obhonene.

Akaghya ko-mosarabha haara,
akaikya ikihundughu ikya
Yëësu, akakikundikirya
ishuuka iyö.

Akakeghegha,
akaghya okobheeka
ikihundughu kiyö
mo-mbeehera

eno yaabhaashirwë
ku-ritare, akahingira
regghena rinene,
akaribha ku-munywa
ughwa embeehera.




Urusikö urwa kabhërë, ndwo rwaarë
urusikö urwa Obhotooro, abhanene
abha abhasëngëri na
Abhafarisaayo,
bhakaghya ku-Piraato.
Bhakatëëbhya Piraato
igha, "Omonene,
torahiita igha,
enkaagha eno
omong'aini ono

waanyöörre
akërëngë
möhöru,
yaaghambirë
igha,

'Nindiriyoka urusikö urwa katatö.'



Mbe, bhakaghya ko-mbeehera,
bhakatoora-ko ekemanyërryö
ikya umuhuri kwe-ghena,
okore hano ömöntö
araashe-ho arihingire,
bhamanye. Bhakatigha
hayö abhasirikare
bhayö, bhararenda
embeehera iyö.



Hano urusikö urwa Obhotooro
rwaahööyë, nyinkyo iyaako,
urusikö urwa Jumapiri,
Maryamu uwa Maghidara,
na Maryamu uwöndë
oora, bhakaghya
okomaaha embeehera.
Tanaaha, ikirighiti
ekenene kekaheta.



Maraika uwa Omonene Waryobha
akarwa mu-ryobha, akahika
ko-mbeehera, akahingira
regkena reera, akaretoora
mbareka, akaikara-ko.


Hano abhasirikare
bhaara bhaarööshë
ghayö, bhakoobhoha
bhököng'u,
bhakakwa rihëku.




Mbe, maraika uyö, akatëëbhya
abhakari bhaara igha,
"Motakoobhoha. Nemanyirë
igha, mwishirë ukutuna
Yëesu ono yaahanëkirwë
ko-mosarabha.
Ta-hano hë. Amarrë
ukuryoka kya bhono
yaaghambirë.

Muushe
mbe

momaache hano
bhaamötöörre."



Mbe, abhakari bhayö bhakatanora
bhöngöbhöngö ukurwa mo-mbeehera
hayö, na eno bhashömëëywë
bhököng'u, kasi bhaana entarëki.
Bhakakenyera këmwë ukughya
ökötëëbhya abheegha abha
Yëësu ghaara maraika uyö
yaabhatëëbhëri.



Mbe, hano bhaaghyanga ökötëëbhya
abheegha abha Yëësu, tamaaha,
bhakasikana na Yëësu. Yëësu
akabhakëërya igha, "Mwaraayë."
Bhakasuntarra Yëësu,
bhakamosaasaama ko
okomoghoota ko-maghörö.





Ekahekera-ho enkaagha, Yëësu akabhooshokera
abheegha abhaaye ikömi na ömwë, hano bhaaryanga
ibhyakorya. Akabhahamera ko bhoora bhaangirë
ukukumya, ko bhono senkoro isyabho, syaangirë
okoghoota amang'ana ghano bhaatëëbhiibhwi na
bharikyabho bhano bhaamörööshë igha m-möhöru,
aryökirë ukurwa mo-bhaku. Hano Omonene Yëësu
yaamarre kushumaasha nabho, akagheghwa, ukughya
mu-ryobha. Akaikara bhoryo ubhwa Waryobha.



Waryobha
yaahanshirë
bhököng'u abhantö
bhonswe igho abha ko-kebhora kono.

Righonshe riyö, ndyo ryaaghërrë
akatoma Omoona uwaaye umumwëmwë,
aashe ko-kebhora kono, okore ömöntö
wowonswe igho ono akumukumya
atakaasira, kasi abhe na
öbhöhöru ubhwa
amakora
ghonswe
igho.



Abharuumi 3:23

Ko bhoora abhantö bhonswe igho bhaakora ëbhëbhë,
ku bhuyö amang'ana ghano bhakokora
teghakötöonia Waryobha hä.

Abharuumi 6:23

Ömöntö wowonswe ono akobha omoghorwa uwa ëbhëbhë,
ehoorohooro iyaaye, nu-ruku urwa amakora ghonswe
igho. Kasi bhëëtö, Waryobha nkotohaana arë öbhöhöru
ubhwa amakora ghonswe igho. Öbhöhöru ubhwa amakora
ghonswe igho bhuyö, tebhokohakerwa hä, kasi
nkohaanwa törë ituho iyö, ko okoghera iya okoghootana
ukwëtö na Omonene uwëëtö Kiristo Yëësu.



Abhaëbhuraania 9:27

Mbe, kya bhoora abhantö bhaatoorerwa-ho ukukwa kamwë igho, na hano ömöntö amarrë ukukwa, keno keekoroobhera, no-kobhotorrwa ikiina.

Abhaëfësö 2:8,9

N-ko okoghera iya örööbhö urwa amaabhë aghaaye, nkyo kyaaghërrë Akabhatöörya ku umukumo ghono moonagho ku-Yëësu Kiristo. Tiyabhatöörya ko okoghera igha mwaamokorra ëkëntö kyokjonswe keera, ti-igho hë, kasi iyö ni-tuho eno Waryobha yaabhahaana. Tiyabhatöörya ko okoghera iya ëkëntö ikiiya kyokjonswe keera mwaakora hë, ku bhuyö ömöntö wowonswe oora atakaihasha.



Abharuumi 10:9,10

Kora haang'ë ërë na uwe, ko bhoora hano oraaghambe na umunywa ughwaho uwe umwene igha, Yëësu m-Monene, na ukumi mo-nkoro iyaaho igha Waryobha yaamuryökëri ukurwa mo-bhaku, noraatöörribhwi na Waryobha. Ko bhoora hano ömöntö araakumi Yëësu Kiristo mo-nkoro iyaaye, ho bhoono akobharwa igha wa heene ku-Waryobha. Hano araaghambe ukurwa mu-munywa ughwaye amang'ana agha umukumo ughwaye, ho akötöörribhwa.



Yohana 3:16,17

Waryobha yaahanshirë bhököng'u abhantö bhonswe igho abha ko-kebharä kono. Righonshe riyö, ndyo ryaaghërrë akatoma Omoona uwaaye umumwëmwë, aashe ko-kebharä kono, okore ömöntö wowonswe igho ono akumukumya atakaasira, kasi abhe na öbhöhöru ubhwa amakora ghonswe igho. Waryobha tiyatömirë Omoona uwaaye ko-kebharä kono, okore abhotorre abhantö ikiina, kasi yaamötömirë, okore atööri abhantö okohetera ku-uyö.



1 Yohana 5:11-13

Keno kekoghera torabha na obhoheene ubhwa ghano Waryobha yaatötëëbhëri igha m-maheene, nö-bhöhöru ubhwa amakora ghonswe igho bhono yaatohaana.

Öbhöhöru bhuyö, ntwabhunyoora ko okoghera iya ukukumya Omoona uwaaye. Ömöntö wowonswe igho ono aana öbhömwë na Omoona uwa Waryobha, uyö naana öbhöhöru bhuyö. Kasi ono ataana öbhömwë na Omoona uwa Waryobha, uyö taana öbhöhöru hë. Mbandëkëëyë amang'ana ghayö, bhëënyu bhano mukukumya Omoona uwa Waryobha, okore momanye igha, mmoona öbhöhöru ubhwa amakora ghonswe igho.



Mataayo 26-28; Ruuka 22-24; Yohana 13-21

Storyline by: Edward D. Hughes

Illustrated by: Janie Forest
and Alastair Paterson

Adapted by: Lyn Doerksen

Suba Simbiti NT (ssc) © 2021, Wycliffe Bible
Translators, Inc. All rights reserved.

<https://www.bible.com/en-GB/bible/2997/MAT.1.SSC>

©2026 Bible for Children, Inc.

www.M1914.org

www.bibleforchildren.org

